

Til Alver kommune

Innspel til høyring om faste kommunale driftstilskot frå Alver kommune

Lynghesenteret (LHS) synes det er eit godt tiltak at Alver kommune opnar for at viktige kulturinstitusjonar kan få moglegheit til å søkje støtte om fast driftstilskot. Dette vil kunne gje ei meir føreseieleg arbeidsform som gjer at vi kan jobba meir langsiktig.

Ei årleg kommunal driftsstøtte kan og vera med å gjera det enklare å få løyse ut midlar frå andre finansieringskjelder som krev eller har ynskje om at kommunen er inne og støttar organisasjonen.

Då Lynghesenteret vart konsolidert med Museumssenteret i Hordland i 2007 og fekk sikra ein minimums økonomi frå stat og fylket, vart det stilt store krav til eigeninntening for at vi skulle klare å ivareta våre faglege oppgåver og tilbod til besøkande, skuleklassar, studentar mm. Krava til eigeninnteninga har auka med åra då dei faste tilskota ikkje har auka i same grad som lønns og prisveksten. Dette gjer at vi må ha stort fokus på eigeninntening og med ein liten fast stab er dette svært utfordrande. Formidling og undervising er bl.a. eit området vi gjerne skulle hatt meir fokus og ressursar til. LHS har ikkje mottatt tilskot til drifta frå Lindås kommune sidan 2006.

Det er 20 års sidan at LHS vart offisielt opna og gjennom desse åra har LHS vorte godt og positivt forankra både lokalt, regionalt, nasjonalt og internasjonalt. I 2001 fekk LHS tildelt UNESCO sin globale kulturlandskapspris for arbeidet med å verne kulturlandskapet gjennom ei aktiv tradisjonell drift. I 2005 vart Lynghesenteret tildelt Europarådet - Europa Nostra sin kulturlandskapspris. LHS spelar og ei viktig rolle i forvaltning av kystlyngheiene i Norge, vi har avtale med Miljødirektoratet om faglege rådgivinga for heile landet, vi er leiar for det Nasjonale Lyngheinettverket og deltek aktivt i «European Heathland Network».

Formålet og verdiane som LHS er bygd på er meir aktuelle enn nokon gong og er godt forankra inn i Unesco Biosfæreområdet. LHS og vårt faglege nettverk har også vore bidragsytarar under arbeidet med Biosfæreområdet og vi ynskjer å bidra vidare i dette arbeidet for heile regionen.

LHS er det meste besøkt museet i MuHo med ca. 12.000 besøkande dei siste åra. Hovudtyngda er frå Nordhordland og Bergensregionen, og vi har stor grad av gjenbesøk. Om sommaren kjem det besøkande frå både inn og utland som vil oppleve lyngheiene, Lygra og regionen. LHS samarbeider med andre aktørar i regionen, Nordhordland Biosfære og Bergen Reiselivslag for auka tilbodet og tilgjengelegheit for ei berekraftig reiselivsnæring.

Det ligg godt til rette for undervising og ulike aktivitetar på Lynghesenteret og Lygra. Vi har eige undervisningsopplegg for grunnskulen og vidaregåande og saman med Brørvikskuta har vi i mange år hatt eit kulturhistorisk undervisningsopplegg «Mat for Bymann og Stril» som har vore svært populært for skulane i regionen. UiB og Høgskulen på Vestlandet mfl. brukar LHS / Lygra og Lurefjorden til feltkurs og undervising kvart år. LHS har mange andre aktivitetar gjennom året som familiesøndagar, konsertar, vikingdagar, ulike kurs og møter, sauesanking mm. I 2025 har LHS 25 år jubileum og vi har no starta arbeidet med å lage ny utstilling/ formidlingsarena som vi ynskjer å opne då.

LHS har hatt godt samarbeid med UIB, Nibio, NINA og andre forskingsinstitusjonar heilt frå starten av og det har vore mange ulike forskingsprosjekt på Lygra. Mange har tatt sin Master eller Ph.d. grad her på forskingsarbeid innan landskapsforvaltning, dyrehald, biologisk mangfald, genressursar, klima, karbonlagring mm. LHS og Lygra er eit viktig referanseområdet fordi ein har drive forskning her i 30 år.

LHS er også engasjert i Smaken av Nordhordland og har vore ein av initiativtakarane til Ullveka og det nystarta Vest Villsaulag. I vårt formål står det m.a. at vi skal vere med å fremja lokal og regional næringsutvikling basert på verdiar som ligg i det historiske kulturlandskapet.

Infobygget på LHS er godt egna til kurs, konferansar, selskap og møter. I eit normal år er infobygget mykje i bruk heile året. I samarbeid med Lygra Gjestegard tilbyr vi også overnatting på Lygra.

For LHS vil det betydd mykje om vi kan fått eit fast driftstilskot Alver, då kunne vi bla. utvikle og auke tilbodet til formidling og undervising, noko som vil kome heile kommunen til gode.

Lygra 17.august 2020

Torhild Kvingedal (sign)
Avdelingsleiar
Lyngheisenteret
Museumssenteret i Hordland